

Ár 2014, þriðjudaginn 6. maí, var fundur í kjararáði að Hverfisgötu 6a í Reykjavík haldinn af Svanhildi Kaaber, Jónasi Þór Guðmundssyni og Kolbeini H. Stefánssyni.

Fyrir var tekið:

### **Að ákveða laun og starfskjör staðgengils sérstaks saksóknara**

#### **I.**

Kjararáð úrskurðaði hinn 15. desember 2009 að heyra skyldi undir ráðið að ákveða laun og starfskjör saksóknara.

#### **II.**

Kjararáði barst bréf dagsett 22. janúar 2014 frá staðgengli sérstaks saksóknara. Í bréfinu er fjallað um ákvörðun kjararáðs um launakjör sérstaks saksóknara nr. 2013.4.031 en þar sé rakið hvernig starfsemi embættis sérstaks saksóknara hafi vaxið og breyst undanfarin ár. Með hliðsjón af því hafi kjararáði þótt ástæða til breytinga á launum sérstaks saksóknara. Með vísan til sömu sjónarmiða og rakin séu í úrskurði kjararáðs um launakjör sérstaks saksóknara er þess farið á leit að laun staðgengils sérstaks saksóknara verið endurskoðuð. Segir í bréfinu að ljóst sé að sömu rök og fram komi í áður nefndum úrskurði varðandi aukið álag eigi einnig við um staðgengil sérstaks saksóknara. Einnig er bent á að álag á saksóknara við embættið hafi aukist mjög undanfarin ár eftir að ákærur hafi verið gefnar út í stórum málum.

Með bréfum dagsettum 31. janúar 2014 var sérstökum saksóknara, innanríkisráðuneyti og fjármála- og efnahagsráðuneyti gefinn kostur á að leggja fram greinargerðir vegna erindisins, sbr. 6. gr. laga um kjararáð nr. 47/2006.

Í svari sérstaks saksóknara dagsettu 12. febrúar 2014 er tekið undir ósk um endurskoðun launakjara enda hafi embættið vaxið að umfangi umfram það sem gert hafi verið ráð fyrir þegar fyrri úrskurður var kveðinn upp. Verkefnum hafi fjölgað mikið og annað umfang starfseminnar aukist, meðal annars með nokkurri fjölgun starfsmanna. Umfang starfs staðgengilsins hafi aukist að sama skapi. Inntak verkefna sem komi til meðferðar hjá embættinu sé þó hið sama, það er rannsóknir og eftir atvikum saksókn í efnahagsbrotamálum.

Í svari innanríkisráðuneytisins dagsettu 14. febrúar 2014 er tekið undir að embætti sérstaks saksóknara hafi vaxið töluvert undanfarin ár. Fram kemur að ráðuneytið telji sig þó ekki til þess bært að meta hvort aukið umfang embættisins hafi haft þau áhrif á störf staðgengils sérstaks saksóknara að ástæða sé til að endurskoða starfskjör hans.

Fjármála- og efnahagsráðuneytið sendi kjararáði bréf dagsett 24. febrúar 2014. Í bréfinu segir að ráðuneytið telji eðlilegt að við mat á ósk saksóknarans verði horft til þess hvernig sambærilegum óskum hafi verið svarað.

Með bréfi dagsettu 28. febrúar 2014 fékk staðgengill sérstaks saksóknara send bréf innanríkisráðuneytis, fjármála- og efnahagsráðuneytis og sérstaks saksóknara til kynningar og honum gefinn kostur á að koma á framfæri athugasemdum við efni þeirra.

Í bréfi staðgengils sérstaks saksóknara dagsettu 6. mars 2014 eru fyrri sjónarmið ítrekuð.

### III.

Um embætti sérstaks saksóknara gilda lög nr. 135/2008. Upphaflega voru verkefni embættisins afmörkuð við rannsókn á grun um refsiverða háttsemi í aðdraganda, tengslum við og kjölfar atburða er leiddu til setningar laga um heimild til fjárveitingar úr ríkissjóði vegna sérstakra aðstæðna á fjármagnsmarkaði, nr. 125/2008, og þess ástands sem þá skapaðist á fjármálamarkaði, hvort sem það tengdist starfsemi fjármálafyrirtækja, annarra lögaðila eða einstaklinga. Þá skyldi embættið eftir atvikum fylgja rannsókn eftir með saksókn. Með lögum nr. 52/2010 og nr. 82/2011 var verksvið embættisins skilgreint með skýrari hætti þannig að nú sinnir það rannsókn og eftir atvikum saksókn í málum tengdum starfsemi fjármálafyrirtækja án tillits til þess hvort fyrirtækin tengist þeim atburðum sem leiddu til setningar laga nr. 125/2008. Einnig hafa verkefni efnahagsbrotadeildar ríkislögreglustjóra verið færð til embættisins.

Rannsóknar- og ákæruheimildir embættisins taka meðal annars til efnahags-, auðgunar- og skattabrota, þar með talið brota sem rannsökuð hafa verið af Fjármálaeftirlitinu, Samkeppniseftirlitinu og skattrannsóknarstjóra ríkisins og vísað hefur verið til lögreglu. Hinn sérstaki saksóknari hefur eftir þörfum samstarf við framangreindar stofnanir. Er þeim skylt að veita honum upplýsingar um stöðu annarra mála en að framan greinir. Með lögum nr. 25/2009 voru heimildir embættisins til að kalla eftir upplýsingum og gögnum auknar, svo og skylda til að láta embættinu þær í té.

Í 2. gr. laganna segir að innanríkisráðherra skipi sérstakan saksóknara og skuli hann veita forstöðu rannsóknar- og saksóknaraembætti. Þá skipar ráðherra þrjá sjálfstæða saksóknara við embættið. Sérstakur saksóknari ræður annað starfsfólk embættisins en saksóknara. Sérstakur saksóknari og saksóknarar við embætti hans skulu fullnægja skilyrðum til skipunar í embætti héraðsdómara. Þeir eru ákærendur samkvæmt lögum um meðferð sakamála og fara með lögregluvald. Sérstakur saksóknari hefur umsjón með störfum annarra saksóknara við embættið og gætir samræmis í störfum þeirra.

Sérstakur saksóknari fól einum saksóknaranna við embættið að vera staðgengill sinn og veitir hann embættinu forstöðu í fjarveru sérstaks saksóknara.

Skipun hins sérstaka saksóknara og saksóknara við embættið fellur niður þegar embættið er lagt niður eða það sameinað annarri ríkisstofnun. Í lögum um embættið segir að innanríkisráðherra geti eftir 1. janúar 2013 lagt til við Alþingi, að fengnu álitu ríkissaksóknara, að embættið verði lagt niður.

### IV.

Í 8. gr. laga um kjararáð segir, að það skuli við úrlausn mála gæta innbyrðis samræmis í starfskjörum þeim sem það ákveður, og að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. Við ákvörðun sína skal kjararáð gæta þess að föst laun fyrir dagvinnu, annarra en forseta Íslands, verði ekki hærri en föst laun forsætisráðherra samkvæmt 3. gr. Við ákvörðun launakjara samkvæmt 4. gr. laganna skuli sérstaklega gæta samræmis milli þeirra og þeirra kjara hjá ríkinu sem greidd eru á grundvelli kjarasamninga annars vegar og ákvarðana kjararáðs samkvæmt 3. gr. hins vegar. Þá skuli kjararáð ætíð taka tillit til almennrar þróunar kjaramála á vinnumarkaði. Í 10. gr. laganna segir að ráðið skuli taka mál til meðferðar þegar því þyki þurfa og ætíð ef orðið hafa verulegar breytingar á þeim launum í þjóðfélaginu sem höfð skulu til viðmiðunar samkvæmt lögnum eða á störfum þeirra sem úrskurðarvald þess tekur til.

Kjararáð tók ákvörðun um laun staðgengils sérstaks saksóknara hinn 11. febrúar 2011. Með vísan til þess að umfang og verkefni embættis sérstaks saksóknara hefðu aukist verulega frá því það tók til starfa ákvað kjararáð breytingar á launum sérstaks saksóknara þann 26. september 2013. Kjararáð telur rétt að laun staðgengils sérstaks saksóknara breytist að sama skapi. Þær breytingar sem síðast voru gerðar á lögum um starfsemi embættisins og eru meðal annars tilefni þessara launabreytinga tóku gildi 1. september 2011. Kjararáð telur því rétt að launabreytingin gildi frá sama tíma.

Með hliðsjón af framansögðu hefur kjararáð ákveðið að laun staðgengils sérstaks saksóknara skuli vera sem segir í ákvörðunarorði.

## V.

### Ákvörðunarorð

Frá og með 1. september 2011 skulu mánaðarlaun staðgengils sérstaks saksóknara vera samkvæmt launaflokki 502-136, nú 790.521 króna.

Frá 1. september til 30. september 2011 skal að auki skal greiða honum 15 einingar á mánuði fyrir alla yfirvinnu er starfinu fylgir. Á sama tíma er eining 1% af launaflokki 502-126 eða 5.306 krónur.

Frá og með 1. október 2011 skal greiða honum 28 einingar á mánuði fyrir alla yfirvinnu er starfinu fylgir. Frá sama tíma er eining 1% af launaflokki 502-132, nú 6.918 krónur.

Einingar greiðast alla mánuði ársins, einnig í sumarleyfi. Af því leiðir að ekki er greitt orlofsfé á einingar.

Laun eru við það miðuð að um fullt starf sé að ræða og þannig ákveðin að ekki komi til frekari greiðslna nema kjararáð úrskurði um það sérstaklega.

Um almenn starfskjör staðgengils sérstaks saksóknara gilda reglur kjararáðs frá 30. maí 2007.

---

Svanhildur Kaaber

---

Jónas Þór Guðmundsson

---

Kolbeinn H. Stefánsson